

Gregorian: Odbacivanje reforme policije predstavlja odbacivanje evropskih integracija

Odbacivanje reforme policije ustvari predstavlja odbacivanje evropskih integracija, prvi zamjenik visokog predstavnika, Raffi Gregorian, je napisao u članku koji je danas objavljen u *Euroblicu*.

“Bar u retoričkom smislu, mnogi politički lideri u Republici Srpskoj izgleda da vjeruju da mogu podržavati i evropsku integraciju Bosne i Hercegovine i odbaciti reformu policije,” napisao je dr. Gregorian. “Problem sa ovim stavom je, da bez reforme policije, Bosna i Hercegovina nema izgleda za evropsku integraciju.”

Prvi zamjenik visokog predstavnika je naglasio da se Evropska unija složila da otpočne razgovore o Sporazumu o stabilizaciji i pridruženju sa Bosnom i Hercegovinom samo nakon što je dobila uvjeravanja, putem Sporazuma o reformi policije 5. oktobra 2005. godine, da su vlasti Bosne i Hercegovine i oba entiteta bili ozbiljni po pitanju restrukturiranja policije na osnovu tri principa EU.

“Da ne zaboravimo, Milorad Dodik i Dragan Čavić su bili ti koji su predložili tekst Sporazuma o reformi policije, koji su zatim prihvatile stranke iz Federacije, međunarodna zajednica i Evropska unija,” nastavio je dr Gregorian.

Prvi zamjenik visokog predstavnika je takođe naglasio da je Direkcija za reformu policije napravila dobar izvještaj na osnovu Sporazuma o reformi policije. “Predložena su rješenja za preostala neriješena pitanja na način da svako dobije ono što mu treba, ako ne i sve što želi. Već smo došli izuzetno

blizu dogovora," napisao je.

Članak je zaključio upozorivši: "Pokretanje procesa ispočetka, kao što neki političari tvrde da je neizbježno, bi vratilo Bosnu i Hercegovinu nekoliko godina unazad, ali ne bi imalo uticaja na krajnji ishod reforme policije. Ostala bi ista pitanja; ostali bi isti principi Evropske unije, a ostala bi i ista područja za kompromis."

Tekst [članka](#) prvog zamjenika visokog predstavnika možete naći na www.ohr.int.